

Jahresrückblick 2023

Anstatt das mir Leiterin z Jahr 2023 reflektiert hei, heimer üs für einisch dänkt, dass mir üsi Meitli chönnte frage was si zu de Highlights vom Jahr meine. Und natürlech si viu spannendi Ussage zäme cho.

Zum Start vom Jahr heimer im Früehlig ah de Spiutäg z Stude teilgno.

D Ungerstuefe berichtet vom Ball über die Schnur und ihrem erfreuleche Sieg i dr jüngste Kategorie uh d Oberstuefe meint erliechteret, dass si sige froh gsi heisis im Volleybau doch no ufe 3.Platz gschafft.

Es isch im grosse und ganze ä sehr erfolgriche Tag gsi o weh uf de Bletter Ussage wi "Unser Team hat jeden Match verloren aber es war trotzdem cool." si gstange. Mir si aso froh het oh i däm Jahr dr Soft Ice stand ä guete Job gmacht.

Chuum dr Schweiss abgwüsch si mir de scho bim Turnfescht z Pieterle i de Startlöcher gstange. Am ne summerleche Tag hei mir dert bim Allrounder, bim Unihockeyparcour und bi de Staffetene ahgriffe. D Meitli verzeue "Es war seeehr heiss, aber lustig." oder "wir mussten zwar viel Rennen, aber es war cool." Oh wes i däm Jahr nid uf z Podest het glängt, het öpper vor Ungersteufe ufgschribe "Wir waren Blitzschnell" und mit däm positive Gedanke schliesse mir so d Erinnerig as Turnfescht 2023 ab.

Vor de Summerferie hei mir üses aujährlche Meitlirige gäge Jugl Wettstritte gha. Aui sige dr glliche Meinig, d Pöschte si luschtig gsi u d Jugl nid immer fair. Troztdäm hei mir ihne dä Pokal überlah u dr Abe mitere feine Cervela lah usklinge.

Bim Aarbäger Stedtlilouf isch z DTV-Stude T-Shirt o nid unentdeckt blibe. D Ungerstuefe het sech dür di Kilometer kämpfft. "Es war sehr sehr anstrengend und ich war aufgeregt." meint eini u wie scho letscht Jahr heimer das mau o wider eh Podest Platz chönne fiire.

Wo d Täg si chürzer worde u d Temperature cheuter hei aui gwüsst iz näheret sech z absolute Highlight vom Jahr: Üses geliebte Soirée. D Oberstuefe het di feschtlechi Stimmig aus Tanzparty uf dr Bühni verträtte u d Ungerstuefe het d ufgab aus Bodyguard nid ganz erfüllt, wöu es isch äue niemerem entgange das d Dilara am Schluss uf dr Bühni het gfäut. Es geitere aber guet u si het ufgschribe "Es hat mega Spass gemacht und ich liebte das Auto."

Churz vor de Wiehnachtsferie simer mit dr Jugl zäme is Waudhuus z Schwaudernou marschirt u hei dert dr Samichlous ahtroffe. Mitemne guete Spruch het meh ä feine Gritibänz und es Schoggistängeli übercho. Dir chöit nech danke das het oh aune gfaue.

Schlussändlech simer froh gsi um di gröschtereils positive Ussage vo de Meitli u hoffe im 24i no meh vo dene chönne z sammle.

Ds Leiterteam Meitschirige Ober-und Ungerstuefe